

觀經善導疏菁華

淨空學

- 一·真如廣大，法性深高。體則元來不動，凡聖齊圓。恆沙功德，寂用湛然。
- 二·定即息慮以凝心，散即廢惡以修善。三福九品，名為散善。思惟正受，即是定善。
- 三·凡夫得生，皆乘阿彌陀佛大願業力為增上緣。釋迦此方發遣，彌陀彼國來迎，豈容不去。
- 四·唯可勤心奉法，畢命為期，捨此穢身，即證彼法性之常樂。
- 五·經說：地下地上虛空三種莊嚴，皆是彌陀淨國無漏真實之勝相。
- 六·此經以觀佛三昧為宗，亦以念佛三昧為宗；一心迴願往生淨土為體。
- 七·謗法與無信，八難及非人，此等不受。一心信樂求願往生，上盡一形，下收十念，乘佛願力，莫不往生。
- 八·正受者，想心都息，緣慮並亡，三昧相應，名為正受。若得三昧，見彼國地，了了分明。
- 九·華嚴經說，思惟正受者，但是三昧之異名。
- 十·此經定為凡夫，不為聖人。諸佛大悲於苦者，心偏愍念常沒眾生，是以勸歸淨土。
- 十一·經云三種眾生，當得往生；一者但能持戒修慈。二者不能持戒修慈，但能讀誦大乘。三者不能持戒讀經，唯能念佛僧等。此之三人，各以己業專精勵意，一日一夜，乃至七日七夜，相續不斷，各迴所作之業，求願往生。命欲終時，阿彌陀佛及與化佛菩薩大眾，放光授手，如彈指頃，即生彼國。上品上生。

- 十二·上中者，經云，不必受持大乘，但言善解，未論其行。又言深信因果，不謗大乘，以此善根，迴願求生。
- 十三·上下者，經云，亦信因果，不謗大乘，但發無上道心，唯此一句，以為正業，更無餘善，迴斯一行，求願往生。皆是佛去世後，一切發大乘心眾生，行業不同，致使去時，迎候有異。云何異，上上去時，佛與無數化佛，一時授手。上中去時，佛與千化佛，一時授手。上下去時，佛與五百化佛，一時授手。直是業有強弱，致使有斯差別。
- 十四·中輩三人，經云，若有眾生，受持五戒八戒，修行諸戒，不造五逆，無眾過患。命欲終時，阿彌陀佛與比丘聖眾，放光說法，來現其前，此人見已，即得往生。是中上持小乘戒凡夫。
- 十五·中中者，經云，受持一日一夜戒，迴願往生。此是佛去世後小善凡夫得生。
- 十六·中下者，經云，若有眾生，孝養父母，行世仁慈，命欲終時，遇善知識，為說彼佛國土樂事，四十八願等。此人聞已，即生彼國。此人在世，自然行孝，非為出離故，因人勸說迴心，即得往生。
- 十七·下上文說，但不作五逆謗法，自餘諸惡悉皆具造，無有慚愧。命終遇善知識，教令稱佛，爾時阿彌陀佛，即遣化佛菩薩來迎此人，即得往生。如此惡人，觸目皆是，若不遇善，定入三塗。
- 十八·下中者，此人先受佛戒，受已不持，即便毀破，又偷常住物，現前僧物，不淨說法，無有一念慚愧之心。命終遇善知識，為說彼佛國土功德，勸令往生，此人聞已，即便見佛，隨化往生。若不遇善，獄火來迎。
- 十九·下下者，此等眾生，作不善業，五逆十惡，具諸不善，此人以惡業故，定墮地獄，多劫無窮。命終遇善知識，教

稱阿彌陀佛，勸令往生，此人依教稱佛，乘念即生。若不遇善，必定下沉。

二十·看此觀經定善，及三輩上下文意，總是佛去世後，五濁凡夫，但以遇緣有異，致令九品差別。上品三人是遇大凡夫，中品三人是遇小凡夫，下品三人是遇惡凡夫。以惡業故，臨終籍善，乘佛願力，乃得往生，到彼花開，方始發心。

二一·經文顯證，佛慈欲使今時善惡凡夫，同沾九品，生信無疑，乘佛願力，悉得生也。如來說此法，但為常沒眾生，不干大小聖也。

二二·德雲語善財言，我於佛法三昧海中，唯知一行，所謂念佛三昧。

二三·經云，佛告舍利弗，若有善男子善女人，聞說阿彌陀佛，即應執持名號，一日乃至七日，一心願生。命欲終時，阿彌陀佛與諸聖眾迎接往生。十方恆沙諸佛，各出廣長舌相，遍覆三千大千世界，說誠實言，汝等眾生，皆應信是一切諸佛所護念經。寧傷今世錯信佛語，不可再自失誤他也。

二四·觀經中，十聲稱佛，即十願十行具足。言南無者，即是歸命，亦是發願迴向之義。言阿彌陀佛者，即是其行，以斯義故，必得往生。但能上盡一形，下至十念，以佛願力，莫不皆往。

二五·經說·西方安樂阿彌陀佛，是報佛報土。言報者，因行不虛，定招來果，以果應因，故名為報。又三大阿僧祇所修萬行，必定應得菩提，今既道成，即是應身。

二六·大品中說，佛告須菩提，色即是化，受想行識即是化，乃至一切種智即是化。一切法皆是化。諸法平等，

法性常空，性空即是涅槃。一切法皆畢竟性空，乃至涅槃亦皆如化。

二七·下品上生云，或有眾生，多造惡法，無有慚愧，如此愚人，命欲終時，遇善知識，為說大乘，教令稱阿彌陀佛，當稱佛時，化佛菩薩現在其前，金光華蓋，迎還彼土，華開已後，觀音為說大乘，此人聞已，即發無上道心。

二八·諸佛如來有異方便，令汝得見，見彼妙事，心歡喜故，即得無生。如來慈哀末代，舉勸勵修，欲令積學之者，無遺聖力冥加現益故也。

二九·如是者，即指法，定散兩門也。如者，如眾生意，隨心所樂，佛即度之；機教相應，復稱為是。如是者，如來所說一切諸法，千差萬別，隨心起行，各益不同。業果法然，眾無錯失稱為是。

三十·我聞，表教旨親承，傳持末代，證成可信。

三一·一時者，如來觀智不增不減，隨緣授法，各益所資。斯乃洪鐘雖響，必待扣而方鳴。大聖垂慈，必待請而當說。

三二·在家者，貪求五欲相續是常，縱發清心，猶如畫水，但以隨緣普益，不捨大悲。

三三·出家者，亡身捨命，斷欲歸真，心若金剛，等同圓鏡，悕求佛地，弘益自他，若非絕離囂塵，此德無由可證。

三四·迦葉等自唯曠劫久沉生死，循環六道，苦不可言，愚痴惡見，封執邪風。不值明師，永流苦海。但以宿緣，得遇慈尊，法澤無私，我曹蒙潤，思佛恩德，碎身親事，無由暫替。

- 三五·菩薩具無量行願，安住一切功德法中，遊步十方，行權方便，入佛法藏，究竟彼岸。宣流正法，愍傷眾生，未曾慢恣，得平等法，荷負群生，皆度彼岸。
- 三六·八戒者，經云在家人持出家戒，此戒持心，極細極急。唯限一日一夜，作法即捨。
- 三七·戒文中云：佛子今旦至明旦，一日一夜，如諸佛不殺生、不偷盜、不行淫、不妄語、不飲酒、不得脂粉塗身、不得歌舞唱伎及往觀聽、不得上高廣大床，此上八是戒非齋。不得過中食，此一是齋非戒。引諸佛為證，是以得知此戒用心起行極是細急，若人一日一夜具持不犯，所得功德，超過人天二乘境界。
- 三八·唯願世尊，為我廣說無憂惱處，我當往生，此濁惡處，地獄餓鬼，畜生盈滿，多不善聚，願我未來，不聞惡聲，不見惡人。
- 三九·韋提希白佛言，世尊，是諸佛土，雖復清淨，皆有光明。我今樂生，極樂世界阿彌陀佛所。唯願世尊，教我思惟，教我正受。
- 四十·夫人總見十方佛國，並悉精華，欲比極樂莊嚴，全非比況，故云我今樂生安樂國也。
- 四一·三界六道不同，種類恆沙，隨心差別。經云，業能莊識，世世處處，各趣隨緣受果報，對面不相知。
- 四二·彌陀四十八願，願願皆發增上勝因，依因起於勝行，依行感於勝果，依果感成勝報，依報感成極樂，依樂顯通悲化，依於悲化，顯開智慧之門。然悲心無盡，智亦無窮，悲智雙行，即廣開甘露，因茲法潤，普攝群生。諸餘經典勸處彌多，眾聖齊心皆同指讚。

- 四三·世尊告韋提希：阿彌陀佛，去此不遠，汝當繫念，諦觀彼國，淨業成者。我今為汝廣說眾譬，亦令未來世一切凡夫，欲修淨業者，得生西方極樂國土。
- 四四·欲生彼國者，當修三福。一·孝養父母，奉事師長，慈心不殺，修十善業。二·受持三歸，具足眾戒，不犯威儀。三·發菩提心，深信因果，讀誦大乘，勸進行者。如此三事，名為淨業，乃是過去、未來、現在，三世諸佛淨業正因。
- 四五·佛光隨身出處，必皆有益，足下放光，照益地獄，膝照畜生，陰藏照益鬼神，臍照修羅，心照人道，口照二乘，眉間照益大乘。若光從眉間出，即從佛頂入者，即受菩薩記。
- 四六·凡惑障深，心多散動，若不頓捨攀緣，淨境無由得現。此即正教安心住行，若依此法，名為淨業成也。
- 四七·如來今者，為未來世一切眾生，為煩惱賊之所害者，說清淨業，汝當受持，廣為多眾，宣說佛語。
- 四八·如來今者，教韋提希，及未來世一切眾生，觀於西方極樂世界。以佛力故，當得見彼清淨國土，如執明鏡，自見面像。見彼國土，極妙樂事，心歡喜故，應時即得無生法忍。
- 四九·應當專心，繫念一處，想於西方，正明總告總勸。
- 五十·眾生識劇猿猴，心遍六塵，無由暫息。但以境緣非一，觸目起貪亂想，安心三昧，何容可得。自非捨緣託靜，相續注心，直指西方，簡餘九域。
- 五一·是以一身，一心，一迴向，一處，一境界，一相續，一歸依，一正念，是名想成就，得正受。此世後生，隨心解脫也。

五二·跏趺正坐，右腳著左膝上與外齊，左足安右膝上與外齊，左手安右手上，令身正直。合口齒勿相近，舌柱上顎，為令咽喉及鼻中氣道宣通故。令觀身四大，內外俱空，都無一物。作此想時，亂想得除，心漸凝定。

五三·不得貪取，若取貪心，心水即動，以心動故，淨境即失。境相搖動不安者，由我貪心動念，致使淨境動滅。即自安心正念，還從本起，動相即除，靜心還現。

五四·彌陀曠劫，等行無偏，正習俱亡，能感地輪之映徹。

五五·捨眾緣，住心一境，能緣之心無亂，所緣之境不動。細想粗想，心水即動，心水即動，靜境即失。

五六·天親讚云，觀彼世界相，勝過三界道，究竟如虛空，廣大無邊際。地下莊嚴七寶幢，無量無邊無數億；八方八面百寶成，見彼無生自然悟。無生寶國永為常，一一寶流無數光；行者傾心常對目，騰神踴躍入西方。西方寂靜無為樂，畢竟逍遙離有無；大悲薰心遊法界，分身利物等無殊。或現神通而說法，或現相好入無餘；變現莊嚴隨意出，群生見者罪皆除。

五七·歸去來，魔鄉不可停。曠劫來流轉，六道盡皆經，到處無餘樂，唯聞愁嘆聲。畢此生平後，入彼涅槃城。

五八·彌陀因行周備，致使感報圓明。寶地莊嚴無比量，處處光明照十方，寶閣華臺皆遍滿，雜色玲瓏難可量。寶雲寶蓋臨空覆，聖眾飛通互往來，寶幢幡蓋隨風轉，寶樂含輝應念迴。帶惑疑生華未發，合掌籠籠喻處胎，內受法樂無微苦，障盡須臾華自開。耳目精明身金色，菩薩徐徐授寶衣，光觸體得成三忍，即欲見佛下金臺。法侶迎將入大會，瞻仰尊顏讚善哉。

- 五九·安樂國清淨，常轉無垢輪；一念及一時，利益諸群生。讚佛諸功德，無有分別心；能令速滿足，功德大寶海。
- 六十·身四威儀，晝夜常念，唯除睡時，憶持不捨。
- 六一·堪受堪信，聞即信行者。不惜身命，急為說之。若得一人捨苦出生死者，是名真報佛恩。
- 六二·為此因緣，但勸即令求生淨土，向無上菩提。是故今時有緣相勸誓生淨土者，即稱諸佛本願意也。
- 六三·經云若人聞說淨土法門，聞即悲喜交流，身毛為豎者。當知此人，過去已曾修習此法。今得重聞，即生歡喜。正念修行，必得生也。
- 六四·其諸寶樹，七寶華葉，無不具足。一一樹上，有七重網。一一網間，有五百億妙華宮殿。諸天童子，自然在中。有大光明，化成幢旛無量寶蓋。是寶蓋中，映現三千大千世界一切佛事。十方佛國，亦於中現。
- 六五·未聞真觀自在隨心，要藉假想以住心，方能證益也。
- 六六·諸寶林樹，皆從彌陀無漏心中流出。由佛心是無漏故，其樹亦是無漏也。
- 六七·無老死，無小生。無初生漸長，起即同時頓起，量數等齊。
- 六八·彌陀淨國寶樹多，四面垂條，天衣挂遶。寶雲含蓋，化鳥連聲，旋轉臨空，奏法音而入會。他方聖眾，聽響以開心。本國能人，見形而取悟。
- 六九·極樂池水流注華間，尋樹上下，其聲微妙，演說苦空無常無我諸波羅密，讚歎諸佛相好。如意珠王，湧出金色微妙光明，其光化為百寶色鳥，和鳴哀雅，常讚念佛念法念僧。

七十·水有八德，一·清淨潤澤。二·不臭。三·輕。四·冷。五·軟。六·美。七·調適。八·飲已無患。

七一·極樂莊嚴安養國，八德寶池流遍滿；四岸含暉間七寶，水色分明映寶光。體性柔軟無堅觸，菩薩徐行散寶香；寶香寶雲成寶蓋，寶蓋臨空覆寶幢。寶幢嚴儀圍寶殿，寶殿寶鈴垂珠網；寶網寶樂千重轉，隨機讚歎寶宮樓。一一宮樓有佛會，恆沙聖眾坐思量；願此有緣常憶念，捨命同生彼法堂。

七二·佛是眾生無上大師，除邪向正。法是眾生無上良藥，能斷煩惱毒病，法身清淨。僧是眾生無上福田，但使傾心四事，不憚疲勞。五乘依果，自然應念所須而至。

七三·專心住境，剋念不移，莊嚴總現。身器清淨，應佛本心。捨身他世，必往無疑。

七四·勸發流通，急救常沒眾生妄愛迷心，漂流六道。但使迴心正念，願生我國，立即得生也。

七五·娑婆苦界，雜惡同居，八苦相燒，動成違返。詐親含笑，六賊常隨，三惡火坑，臨臨欲入。

七六·至心懺悔，發露所造之罪，極生慚愧，悲泣流淚。願佛慈悲，攝受護念，指授開悟所觀之境，願得成就。

七七·初想不得亂想多境，即難得定。或一日二日，或一月一年二三年等，無間日夜，行住坐臥，身口意業，常與定合。唯萬事俱捨，由如失意聾盲癡人者，此定必即易得。若不如此，三業隨緣轉，定想逐波飛，縱盡千年壽，法眼未曾開。即得定心，彼諸莊嚴，一切顯現。

七八·諸佛如來是法界身，入一切眾生心想中。是故汝等心想佛時，是心即是三十二相，八十隨形好。是心作佛，是心是佛。諸佛正遍知海，從心想生，是故

應當一心繫念，諦觀彼佛多陀阿伽度阿羅訶三藐三佛陀。

七九·心遍故解法界，身遍故解法界，無障礙故解法界。正由心到故身亦隨到，身隨於心，故言是法界身也。法界是所化之境，即眾生界也。身是能化之身，即諸佛身也。

八十·是心是佛，依自信心緣相如作也。是心是佛，心能想佛，依想佛身而現，即是心佛也。離此心外，更無異佛者也。

八一·今此觀門，指方立相，住心而取境，總不明無相離念也。如來懸知末代罪濁凡夫，立相住心，尚不能得，何況離相而求事者。

八二·身四威儀，眼之開合，見一金像，似現目前，常作此想。若欲教人，即教此法。恆持莫失，名守定心，令與修多羅合。至得念佛三昧，現蒙利益。

八三·彼佛圓光，如百億三千大千世界。於圓光中，有百萬億那由他恆河沙化佛。一一化佛，亦有眾多無數化菩薩以為侍者。

八四·無量壽佛，有八萬四千相。一一相中，各有八萬四千隨形好，一一好中，復有八萬四千光明。一一光明，遍照十方世界念佛眾生，攝取不捨。

八五·但當憶想，令心眼見，即見十方一切諸佛。以見諸佛故，名念佛三昧。

八六·觀佛身，亦見佛心。佛心者，大慈悲是。以無緣慈，攝諸眾生。作此觀者，捨身他世，生諸佛前，得無生忍。是故智者，應當繫心諦觀無量壽佛。見無量壽佛者，即見十方無量諸佛。得見無量諸佛故，諸佛現前授記。

- 八七·眾生憶念佛，佛亦憶念眾生，彼此三業不相捨離。眾生願見佛，佛即應念現在目前。即見諸佛，即於定中得蒙授記。稱念，即除多劫罪。命欲終時，佛與聖眾自來迎接。諸邪業繫，無能礙者。自餘眾行，雖名是善，若比念佛，全非比校。是故諸經廣讚念佛功能。經中唯明專念彌陀名號得生，十方恆沙諸佛證誠不虛也。八八·佛心者，慈悲為體，以此平等大慈普攝一切也。
- 八九·佛告阿難，觀觀世音菩薩者，不遇諸禍，淨除業障，除無數劫生死之罪。如此菩薩，但聞其名獲無量福，何況諦觀。
- 九十·從下方金光佛剎，乃至上方光明王佛剎。於其中間，無量塵數分身無量壽佛，分身觀世音大勢至。皆悉雲集極樂國土，罽塞空中，坐蓮華座，演說妙法，度苦眾生。彌陀觀音等分身雲集相，說法各應所宜。勢至威高，坐搖他國，能使分身雲集，演法利生，永絕胞胎，常遊法界。
- 九一·當起自心，生於西方極樂世界。於蓮華中，結跏趺坐，作蓮華合想，作蓮華開想。蓮華開時，有五百色光來照身想。眼目開想，見佛菩薩滿虛空中，水鳥樹林，及與諸佛。所出音聲，皆演妙法。若出定時，憶持不失，名見無量壽佛極樂世界。
- 九二·定散無遺，守心常憶，觀心明淨，諸惡不生。內與法樂相應，外無三邪之障，即蒙彌陀等三身護念之益。
- 九三·無量壽佛宿願力故，有憶想者，必得成就，但想佛像，得無量福。
- 九四·如來教諸眾生易境轉心，為令機境相稱，易得成故。

九五·彌陀觀音勢至等，宿願緣重，誓同捨惡，等至菩提，影響相隨，遊方化益。

九六·上品上生者，發三種心，一·至誠心。二·深心。三·迴向發願心。具三心者，必生彼國。

九七·復有三種眾生，當得往生。一·慈心不殺，具諸戒行。二·讀誦大乘方等經典。三·修行六念，迴向發願，願生彼國。具此功德，一日乃至七日，即得往生。

九八·生彼國時，此人精進勇猛故。阿彌陀如來，與觀世音大勢至，無數化佛，聲聞大眾；觀世音菩薩執金剛臺，與大勢至菩薩，至行者前；阿彌陀佛，於大光明，照行者身；與諸菩薩，授手迎接。觀世音大勢至，與無數菩薩，讚歎行者，勸進其心。行者見已，歡喜踴躍，自見其身，乘金剛臺，隨從佛後，如彈指頃，往生彼國。生彼國已，見佛色身眾相具足。見諸菩薩，色相具足。光明寶林，演說妙法，聞已即悟無生法忍。經須臾間，歷事諸佛，遍十方界，於諸佛前，次第受記，還至本國，得無量百千陀羅尼門，此即修學大乘上善凡夫人也。

九九·至誠心，至者真，誠者實。欲明一切眾生身口意業所修解行，必須真實心中作。不得外現賢善精進之相，內懷虛假貪瞋邪偽，奸詐百端，惡性難侵，事同蛇蝎。雖起三業，名為雜毒之善，亦名虛假之行，不名真實業也。若作如此安心起行者，縱使苦勵身心，日夜十二時，急走急作，如灸頭燃者，眾名雜毒之善。欲迴此雜毒之行，求生彼佛淨土者，此心不可也。何以故，正由彼阿彌陀佛因中行菩薩行時，乃至一念一剎那三業所修，皆是真實心中作。凡所施為趣求，亦皆真實。真實心中制捨自他諸惡及穢國等。行住坐臥，想同一切菩薩制捨諸惡，我亦如是。真實心中勤修自他凡聖

等善，真實心中口業讚歎彼阿彌陀佛，及依正二報，讚歎一切眾生三業所為善。

- 一〇〇．真實心中意業思想，觀察憶念，彼阿彌陀佛，及依正二報，如現目前。若非善業者，敬而遠之，亦不隨喜也。
- 一〇一．深心即是深信之心。決定深信自身，是罪惡生死凡夫，曠劫以來，常沒常流轉，無有出離之緣。決定深信，阿彌陀佛，四十八願，攝受眾生，無疑無慮，乘彼願力，定得往生。深信釋迦佛說此經，十方恆沙諸佛，證勸一切凡夫，決定得生。一心唯信佛語，不顧身命，決定依行。佛遺捨者即捨，佛遣行者即行，佛遣去處即去，是名隨順佛教，隨順佛意，是名隨順佛願，是名真佛弟子。一切行者，但能依此經，深信行者，必不誤眾生。佛所有言說，即是正教、正義、正行、正解、正業、正智，若佛所說，即是了教，是故今時，仰勸一切有緣，往生人等，唯可深信佛語，專注奉行。不可信用菩薩等不相應教，以為疑礙，抱惑自迷，廢失往生之大益也。深心深信，決定建立自心。順教修行，永除疑錯。不為一切別解、別行，異學、異見、異執之所退失傾動也。
- 一〇二．說觀經，彌陀經，唯為佛滅後，五濁、五苦等一切凡夫，證言得生。為此因緣，我今一心依此佛教，決定奉行。
- 一〇三．縱使地前菩薩、羅漢、辟支等，若一若多，乃至遍滿十方，皆引經論證言不生者。我亦未起一念疑心，唯增長成就我清淨信心。何以故，由佛語決定成就了義，不為一切所破壞故。
- 一〇四．縱使初地以上，十地以來，若一若多，乃至遍滿十方，異口同音，皆云，釋迦佛指讚彌陀，毀毗三界

六道，勸勵眾生，專心念佛，及修餘善，畢此一身後，必生彼國者，此必虛妄，不可依信也。我雖聞此等所說，亦不生一念疑心，唯增長成就我決定上上信心。何以故，乃由佛語真實決了義故。佛是實知、實解、實見、實證，非是疑惑心中語故。又不為一切菩薩異見異解之所破壞。若實是菩薩者，眾不違佛教也。

- 一〇五·縱使化佛報佛，若一若多，乃至遍滿十方，各各輝光吐舌遍覆十方，一一說言，釋迦所說相讚勸發一切凡夫，專心念佛，乃修餘善，迴願得生彼淨土者，此是虛妄，定無此事也。我雖聞此等諸佛所說，畢竟不起一念疑退之心，畏不得生彼佛國也。何以故，一佛一切佛，所有知見、解行、證悟、果位、大悲等同，無少差別。是故一佛所制，即一切佛同制，如似前佛制，斷殺生十惡等罪，畢竟不犯不行者。即名十善十行。隨順六度之義。若有後佛出世，豈可改前十善令行十惡也。以此道理推驗，明知諸佛言行不相違失。
- 一〇六·釋迦指勸一切凡夫，盡此一身，專念專修，捨命已彼定生彼國者。即十方諸佛悉皆同讚同勸同證。何以故，同體大悲故。一佛所化，即是一切佛化。一切佛化，即是一佛所化。彌陀經中說，釋迦讚歎極樂，種種莊嚴。勸一切凡夫，一日七日，一心專念彌陀名號，定得往生。
- 一〇七·十方各有恆河沙等諸佛，同讚釋迦，能於五濁惡時、惡世界、惡眾生、惡見、惡煩惱，惡邪無信盛時，指讚彌陀名號。勸勵眾生稱念，必得往生，即其證也。
- 一〇八·十方佛等，恐畏眾生不信釋迦一佛所說。即共同心同時，各出舌相遍覆三千世界，說誠實言，汝等眾生，皆應信是釋迦所說所讚所證。一切凡夫，不問罪福多少，時節久近。但能上盡百年，下至一日七日。

一心專念彌陀名號，定得往生，必無疑也。是故一佛所說，即一切佛同證，誠其事也。

- 一〇九．專依往生經行行者，是名正行。何者是也，一心專讀誦此無量壽經、觀經、彌陀經等，一心專注思想觀察憶念彼國二報莊嚴，一心專禮彼佛，專稱，專讚歎供養，是名為正。
- 一一〇．一心專念彌陀名號，行住坐臥，不問時節久近，念念不捨者，是名正定之業，順彼佛願故，若依禮誦等，即名為助業，除此正助二行以外，自餘諸善悉名雜行。
- 一一一．若修前正助二行，心常親近憶念不斷，名為無間也。若行後雜行，即心常間斷，雖可迴向得生，眾名疏雜之行也。
- 一一二．言迴向發願心者，過去及以今生，身口意業所修世出世善根，及隨喜他一切凡聖身口意業所修世出世善根，悉皆真實深信心中，迴向願生彼國。
- 一一三．迴向發願願生者，必須決定真實心中迴向，願作得生想。此心深信，由若金剛，不為一切異見、異學、別解、別行人等之所動亂破壞。唯是決定一心，投正直進。不得聞彼人語，即有進退，心生怯弱，迴願落道，即失往生之大益也。
- 一一四．佛法不思議，隨出一門，即出一煩惱門。隨入一門，即入一解脫智慧門。為此隨緣起行，各求解脫。我之所愛，即是我有緣之行。汝之所愛，即是汝有緣之行。是故各隨所樂而修其行，必疾得解脫也。
- 一一五．行者當知，若欲學解，從凡至聖，乃至佛果，一切無礙，皆得學也。若欲學行，必藉有緣之法，少用功勞，多得益也。

- 一一六· 愛心常起，能染污善心。瞋嫌之心，能燒功德之法財。
- 一一七· 眾生久沉生死，曠劫輪迴，迷倒自纏，無由解脫。仰蒙釋迦發遣，指向西方，又藉彌陀悲心招喚。今信順二尊之意，念念無遺，乘彼願力，得生彼國，與佛相見，慶喜何極也。
- 一一八· 一切行者，行住坐臥，三業所修，無問晝夜時節，常作此解，常作此想，名迴向發願心。
- 一一九· 生彼國已，還起大悲，迴入生死，教化眾生，亦名迴向也。
- 一二〇· 三行既具，無行不成。願行既成，若不生者，無有是處也。
- 一二一· 殺業有多種，皆能招罪障生淨土。但於一切生命起於慈心者，即是施一切眾生壽命安樂。亦是最上勝妙戒也。
- 一二二· 眾生性習不同，執法各異。修慈持戒，讀誦大乘。戒能持五乘三佛之機，法薰成三賢十地萬行之智慧。若以德用比較，各有一能。修行六念者，所謂念佛法僧，念戒捨天等。念佛，即專念阿彌陀佛身口意功德，一切諸佛亦如是。又一心專念，諸佛所證之法。念諸佛之戒，念過去諸佛現在菩薩等，難作能作，難捨能捨。但欲念法，不惜身財，仰學賢聖，即自思念，我身無際以來，共他同時發願，斷惡行菩薩道。他盡不惜身命，行道進位，因圓果熟。我等凡夫，乃至今日，虛然流浪，煩惱惡障，轉轉增多，福慧微微，思忖此事，不勝心驚悲歎。發心以後，誓畢此生，無有退轉，唯以淨土為期。

- 一二三·上品中生者，不必受持讀誦方等經典，善解義趣。於第一義，心不驚動。深信因果，不謗大乘。以此功德，迴向願求生極樂國。
- 一二四·上品下生者，亦信因果，不謗大乘。但發無上道心，以此功德迴向願求生極樂國。
- 一二五·若深信生死苦者，罪業畢竟不重犯。若深信淨土無為樂者，善心一發永無退失也。
- 一二六·於一切大乘，若起疑謗。縱使千佛遶身，無由可救。
- 一二七·發一念厭苦，樂生諸佛境界，速滿菩薩大悲願行。還入生死普度眾生。名發菩提心。
- 一二八·上輩上行上根人，求生淨土斷貪瞋，就行差別分三品，五門相續助三因。一日七日專精進，畢命乘臺出六塵，慶哉難逢今得遇，永證無為法性身。
- 一二九·中品上生，若有眾生，受持五戒，持八戒齋，修行諸戒。不造五逆，無眾過患，以此善根，迴向願求生於西方極樂世界。
- 一三〇·中品中生，若有眾生，若一日一夜持八戒齋，若一日一夜持沙彌戒，若一日一夜持具足戒，威儀無缺。以此功德，迴向願求生極樂國。
- 一三一·中品下生者，若有善男子善女人，孝養父母，行世仁慈。此人命欲終時，遇善知識，為其廣說阿彌陀佛國土樂事。亦說法藏比丘四十八願，聞此事已，尋即命終，生西方極樂世界。
- 一三二·中輩中行中根人，一日齋戒處金蓮，孝養父母教迴向，為說西方快樂因。佛與聲聞眾來取，直到彌陀華座邊，百寶華籠經七日，三品蓮開證小真。

- 一三三·下品上生者，或有眾生，作眾惡業，雖不誹謗方等經典。如此愚人，多造惡法，無有慚愧。命欲終時，遇善知識，為說大乘十二部經首題名字。以聞如是諸經名故，除卻千劫極重惡業。智者復教合掌叉手，稱南無阿彌陀佛。稱佛名故，除五十億劫生死之罪。爾時彼佛，即遣化佛，化觀世音，化大勢至，至行者前。讚言，善男子，以汝稱佛名故，諸罪消滅，我來迎汝。
- 一三四·造罪之人障重，加以死苦來逼，善人雖說多經，餐受之心浮散，由心散故，除罪稍輕。又佛名是一，即能攝散以住心，復教令正念稱名，由心重故，即能除罪多劫也。
- 一三五·望佛願意，唯勸正念稱名，往生義疾，不同雜散之業。如此經及諸部中，處處廣歎，勸令稱名，將為要益也。非但念佛獨得往生，法僧通念，亦得去也。
- 一三六·下品中生，或有眾生毀犯五戒八戒，及具足戒。如此愚人，偷僧祇物，盜現前僧物，不淨說法，無有慚愧，以諸惡業而自莊嚴。如此罪人，以惡業故，應墮地獄。命欲終時，地獄眾火，一時俱至。遇善知識，以大慈悲，即為讚說阿彌陀佛，十力威德，廣讚彼佛光明神力，亦讚戒定慧解脫解脫知見。此人聞已，除八十億劫生死之罪，地獄猛火，化為清涼風，吹諸天華。華上皆有化佛菩薩，迎接此人，如一念頃即得往生。
- 一三七·下品下生者，或有眾生，作不善業，五逆十惡，具諸不善。如此愚人，以惡業故，應墮惡道，經歷多劫，受苦無窮。如此愚人，臨命終時，遇善知識種種安慰，為說妙法，教令念佛。彼人苦逼，不遑念佛。善友告言，汝若不能念彼佛者，應稱無量壽佛，如是至心，令聲不絕，具足十念，稱南無阿彌陀佛。稱佛

名故，於念念中除八十億劫生死之罪。命終之時，見金蓮華，猶如日輪，住其人前。如一念頃，即得往生極樂世界。

- 一三八·如四十八願中，唯除五逆誹謗正法不得往生。今此觀經下品下生中，簡謗法攝五逆者，有何意也。答曰，此義仰就抑止門中解，此之二業，其障極重，眾生若造，直入阿鼻，無由可出。方便止言，不得往生。亦不是不攝也。
- 一三九·下輩下行下根者，十惡五逆等貪瞋，四重偷僧謗正法，未曾慚愧悔前愆。終時苦相如雲集，地獄猛火罪人前，忽遇往生善知識，急勸專稱彼佛名。化佛菩薩尋聲到，一念傾心入寶蓮，三華障重開多劫，於時始發菩提因。
- 一四〇·韋提希與五百侍女，聞佛所說，應時即見極樂世界廣長舌相。得見佛身，及二菩薩，心生歡喜，歎未曾有。豁然大悟，逮無生忍。五百侍女，發阿耨多羅三藐三菩提心，願生彼國。世尊悉記，皆當往生、生彼國已，獲得諸佛現前三昧。無量諸天，發無上道心。
- 一四一·此經亦名淨除業障，生諸佛前。行此三昧者，現身得見無量壽佛，及二大士。
- 一四二·善男子善女人，但聞佛名二菩薩名，除無量劫生死之罪，何況憶念。
- 一四三·若念佛者，當知此人，則是人中芬陀利華。觀世音菩薩，大勢至菩薩，為其勝友。當坐道場，生諸佛家。
- 一四四·佛告阿難，汝好持是語，持是語者，即是持無量壽佛名。

- 一四五·念佛三昧功能超絕，實非雜善得為比類。專念，續念。此人甚為希有。
- 一四六·念佛者，即是人中好人，人中妙好人，人中上上人，人中希有人，人中最勝人也。
- 一四七·專念彌陀名者，即觀音勢至常隨影護，亦如親友知識也。
- 一四八·雖說定散兩門之益，望佛本願，意在眾生一向專稱彌陀佛名。真宗巨遇，淨土之要難逢。欲使五趣齊生，是以勸聞於後代。但如來神力，轉變無方，隱顯隨機，異眾因此同聞，莫不奉行而頂戴。

[淨空法師專集網站\(簡\)製作](#)